


島

# 島岡林先生全集

廿七之八

太政官文庫		
和	三	三
書	一	八
門	〇	三
	二	二
	一	一
六	六	六
七	七	七
冊	冊	冊

内閣文庫		
和	三	三
書	一	八
類	〇	三
	二	二
	一	一
二	六	六
五	七	七
函	冊	冊
一		
九		
架		



内閣文庫	
番號	和 31803
冊數	67 ( 21 )
函號	205 176



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



附 165

鳳岡林先生全集卷之二十七

男朝散大夫國子祭酒林信充士僖父輯




詩部

七言律詩

携子弟遊長鳴道仙郭外別墅作一律述謝意

坐子董風叙舊因幽莊寂寂鎖松筠深林連綠鳴禽  
變甘肉割紅細膾新鴻術長傳三世業狐祠近接片  
雲隣前溪漲起上池水洗滌塵腸無寸塵

偶應中村氏房喬之招和其詩韻 并序



寶永己丑孟夏七賞與嫡男及門侶六七  
人偶應中村氏房喬之招治具丁寧漏箭  
屢移玉露之談鬻聯之興知無有不言言  
無有不盡呈以詩律暢叙舊情原其始則  
昌平學寮遊學之長頻頻而來誘引諸生  
親炙講筵中則金城宿直之徒日日相遇  
不遑通語咫尺千里今日之遊支頤促膝  
兩情不隱乃反其終如輔車相依似川流  
歸海飲燕雖樂感懷有餘因和詩韻以謝  
厚意

昌平學舍久經歲洒掃杏華壇上塵官路委身勞劇  
務教風施化感彌綸海山浩蕩舊恩渥陵谷變移雲  
物新絕勝巴池談夜雨偏驚駟隙轉奔輪

端午忌辰有感而作

一世推移三十歲蔭榮改觀整冠紳香羅疊雪 先  
君賜粽飯連筒宗室親半記半忘蹤漸舊有憂有喜  
事皆新揚州煉鏡拭塵垢照得蒼顏白髮身

送釋英岳歸故山 并序

進休庵主英岳老衲自幼苦學逐歲不息  
三密之法漸熟無畏之惑既解累遇薦舉

超越同隊住持長谷指揮群侶歷臘階而  
列僧正應 召東來恩遇日渥嗚呼如何  
不淑今茲孟春倏遇國哀百姓喪考妣萬  
方失依賴老衲拋經飛錫欲歸舊院發途  
日迫緇素之交茶飯之會心不能忘言不  
能罄乃賦小律以述寸情

方外修交二十年公私會遇又何緣絳衣說法佩恩  
賚銀燭連光照舞筵平野去時新草木故園歸日舊  
山川欲知祕容藏中意進退休休獨自眠

明遺臣舜水朱之瑜魯璣畫像

并序

節因危見道因困亨居危之節處困之道  
自古至今固難矣哉常人計較利害枉志  
矯情有所折而不守其操也志士唯植綱  
常不論得喪仁之所在殺身成之義之所  
在捨生取之明室遺臣舜水朱徵君通習  
經傳發明旨趣辭謝官職高尚行事生衰  
弊之世遇艱險之時切齒清兵竭誠魯王  
飄轉安南耿介不屈寄寓我國韜晦有待  
不以存亡而改其志也因卦之象曰致命  
遂志蓋其有所庶幾者乎因題肖像云

龍山雲氣降豪英時世屯難義志亨皇運何當開寶曆虜塵不敢污冠纓魯連憤耻蹈東海枋得精忠事北行異境術空人亦去汗素長照寸丹誠

白蓮

洗出人間塵垢腸素羅含露氣淒涼雲間玉井萬重綠風送鑑湖百里香不蔓不枝孤立操有文有質斐然章天成佳色去雕飾花影宜升君子堂

中秋懷舊

并引

我家父祖以來每遇秋半開設雅會禱晴厭雨吟風弄月酒殺以羅詠觴互酬不覺

漏箭之移不知東方之既白醉賞弗措以爲恒式也嗚呼天譴屢降家災難追長兄早世應召玉樓大爺經歲晦跡黃泉未幾嫡嗣永訣舊朋多歿我獨慙遺隱憂無聊雖負佳期難廢家法二三門徒或來或去其後每歲陪金城歌舞之宴拜綵綾餅饅之惠百千家之多不及私宴之榮二十年之久豈忘官恩之深哉二子起予吹埴吹箎諸生秩筵弄筆弄硯再修騷壇之盟漸復昔年之遊自此而後亦以爲例也

今茲忽遇 國哀改變世粧僕身老氣億  
心絕肝摧惟此端正不堪感慕負月鬱陶  
見雲茫然胸霧充塞淚雨淋漓陰晴難辨  
起卧惱情強作一律以叙舊懷

昔陪盛宴祝千歲今感舊恩悲半秋霓羽輕飄金殿  
舞龍弓空墮馬湖遊榮枯移轉夢中夢明暗去來愁  
裏愁擁枕無心問陰霽任他雲霧鎖瓊樓

丹楓

皆川山  
城守席

秋粧奪却百花春葉葉添紅漸已勻染不成乾乾便  
落濃而如淡淡還新釣緝有約南寧客拄杖欲迎東

禪人妙手休誇再三人滿林錦繡示天心

謝惠桂花

自無桃李艷陽姿仙竈蒸雲金粟炊鷺嶺幽香乘月  
落燕山美譽報人知我家既翁雙男子何日高攀第  
一枝靈種遠從天上得世間花卉更羞比

九日退 公偶作一首叙一家無事雙男強

健之喜

滿城雨霽氣淒涼來雁知時報晚商萸佩雖呈今日  
觀菊衣猶引去年香弟兄和樂雙雙影星物推移九  
九陽短髮何羞風落帽登高無意望他鄉

九月十三夜有感而作

歲歲今宵侍玉欄清歌妙舞佩珊珊仙宮靈藥術空  
盡舊日恩衣露未乾負月自嘆雙鬢白對燈唯表寸  
心丹菊英猶帶重陽淚添得暗光不忍看

有命携二男緩步林園辱蒙鴻恩之深

飽窮雄眺之壯因賦一律以表寸忱

天錫閔休期萬秋荷恩佩惠步林丘綠蕪通徑靈臺  
大玉沫穿巖飛瀑流勝狀何論兎園美嘉祥唯說鳳  
池遊威風德化育群物深樹分陰六十州

賀致仕越智公七十筭

并序

仲冬十一日前執政拾遺越智公誕辰也  
今茲七十其令嗣及諸弟開盛筵祝壽筭  
期天福之無疆也公曾爲京兆職司監護  
禁廷其後列老臣執國政其祖其父三世  
共居權官張氏三相韓家三世亦是異域  
同日之談也所謂積善有餘慶者乎頃歲  
身老務劇掛冠解印閑居青山以謝來客  
余家世世出入其門及聽此會不堪歡抃  
因裁一律慶之賀之

奕世威權揚譽聲幽居謝務掩茅衡松筠能保飽霜



操葵藿猶存傾日誠綠野無塵事蕭散華封有約祝  
長生南溪欲讓江山美明月清風夜夜情

爲備前守丹治信敏懷舊作 并序

水戶世子從三位行左近衛中將源公曾  
手書物有本末事有終始知所先後則近  
道矣十六字授家臣從五位下備前守丹  
治真人信敏拜謝珍藏有年于茲今茲孟  
冬十二日源公不幸罹病逝于正寢信敏  
悲泣追慕之餘分押恩賜之字以爲韻礎  
各作懷舊之詩而抑憂戚嗚呼在則人亡

則書手澤現存雖不能讀清容洋洋如在  
其上一字一淚萬感萬嘆察其衷情不堪  
哀痛余亦依其求備其員乃作一律以述  
餘意

天降龍種欲貽厥遠入佳城嘆鬱鬱墨瀋流芳擷藻  
詞彩雲認跡留朱紱羽林儀表武維揚宗室雋望氣  
未屈豈意常山圭璧珍埋光長作地中物

勿齋藤公二十七回忌辰

雪月風花堪斲魂豈忘連袂步前園健毫留跡龍鱗  
動流矢過陰電影奔時世移遷固基址官途榮耀大

家門昔年交友今無幾自愧老身唯獨存

先大君新廟落成有感而作

新廟巍然固址基珠薨銅瓦影參差梁炊半熟生前  
富薤露易晞身後悲洪運變更皆改觀小祥奈祀未  
終期衣冠濟濟紆朱紫能抱丹誠又有誰

中堂萬部讀誦初筵有感作

幔幕旗幢秩秩筵金爐香燼燭光鮮悲懷追跡萬方  
索妙法發聲千口傳禮典唯論哀戚切時粧便覺俗  
情遷侍臣莫忘存誠敬知有精靈在後前

詣中堂拜禮之後有感而作

昔拂經筵陪講義今臨法會拜 靈威哀情難解意

中緒 恩賜猶存身上衣克惕萬邦勲業大纜經一

歲事功非長生祈福竟無益回顧蒼天帶淚歸

萬部法會結願有感而作

帝鄉路遠去悠悠逝者不歸無所求雲暗茂陵松柏  
雨風悲召澗藻蘋流法華終卷萬回會治教筭年三  
十周似識生平 恩德厚走飛蚊動共含憂

尊大君詣 御佛殿還 御之後拜參有感而

作

列侯蹲踞護 台轅萬騎如雲征旆翻金額顯門

宸翰美彩紋賜被法場尊曼陀雨逐天葩落百和香  
隨煙穩存日暮無人廟廊靜不知何處吊 靈魂

季冬二十五日雪

昨夜同雲雪四敷衣稜衾鐵砭肌膚昔追禁體評花  
月今恐寒威擁竹爐皆謂階庭積盈尺不知風戶暗  
投珠自嗟衰老詞才之欲得新吟一字無

亡嗣雞峯二十五回忌辰不堪追慕因致薄

奠乃賦一律以代澗毛

無涯心事暗傷悲白髮爺孃老愁遺乙丑年周逢已  
丑舊時物換感今時春秋祠祭後前見風月騷遊寤

寐思家有水仙馨弟在梅花雖落弄墳篋

除夜吟

爐火絀衾養此身僉言明日是雞晨世糴似改多依  
舊天意無常悉就新暮走朝奔過門客寒離熱附滿  
城人閑居送歲絕求願縱混俗塵出俗塵

先大君一周忌辰不堪追慕號泣蒼天謹賦一  
律以述餘哀

別來造次不能忘矧又諱辰逢小祥細柳雨添今日  
淚落梅雲認去年香形聲絕跡 廟堂遂威惠及人  
山水長默記昔時多少事東方已白忽昏黃

顯祖忌辰不堪追慕謹賦一律

昔陪膝下未成童永訣今歎鶴髮翁五十諱辰加四  
白數行淚雨落雙紅官途依樣葫蘆畫祭祀竭誠蘋  
菜籠期祝家兒繩祖或含情默禱坐春風

二月二日雪恐寒而作

昨夜寒風雪滿門凸凹平白總無痕祈年耕叟欲呈  
瑞恐凍行人莫斷菟石鼎煎茶生蟹眼方爐煨芋得  
鴟罇鎖窓不愛半庭景勝六何心賁一園

悼河崎延貞 并序

伊勢外宮祠官正四位上河崎延貞去歲

十月没于勢州壽七十六平生潛心神書  
專修職業且尊儒風好騷雅又嗜醫術辨  
茶味閑適消日厭避俗事卜其居曰清窩  
名其堂曰三餘與余相識有年及聞其訃  
不堪哀情乃作一律以述事實而代紼謳  
以叙情思云

遠聞永訣不堪情人乘白雲何處行七秩加多經六  
歲三餘可惜送殘生靜觀北苑茶煙起掬取上池泉  
脉亨禊事日修清淨地宮川一派濯塵纓

次韻送小出長尚 并序

小出長尚者諏訪之產也來學問字親炙  
座右在寮之間十有六年學科漸進筮仕  
已成今茲二月依君命出寮舍演述別情  
投示律詩其志可感句意亦穩因繼韻趾  
以爲期祝

歸鴻告別出群行回顧文園六藝芳蘭化浴身君子  
室菜羞列袂聖人堂江湖燈淡十年雨風月窓明一  
夜光同學親用雖隔地心交有約莫相忘

謹告惺窩先生之靈

并序

惺窩先生名肅字歛夫號北肉山人又稱

廣胖窩世所謂下冷泉家也其子孫今猶  
奉仕官廷先生幼而穎慧有大志衆皆稱  
神童及長斟酌濂洛之流沂泗洙泗之源  
諳誦經史子集無不窮其蘊奧裁作詩賦  
文章無不竭其精妙英才德量載在口碑  
我祖羅山子遊其門受其業別與一家得  
蒙餘化瞻仰弗措追慕無忘幸依良緣謹  
獻微金唯冀忌日之祭不廢薄奠墳墓之  
垣不及斷亾因賦律詩以述衷情精靈有  
知來格于此

道學傳心一代儒文才郁郁德華俱丹誠唯仰中洲  
日素志欲乘東海桴北肉山深觀良象南城雲遠詠  
壇零寸胸洒落絕塵滓寫出濂溪風月圖

今茲之春  
林光院長

老東來晤語之次及惺窩先生之事其墳墓在院內  
故寄納黃金一枚以爲忌日祭奠墳墓修補之料

慰肥後羽林源君喪老母并序

肥後羽林源綱利君喪老母堂清高院殿  
哭泣仆地哀慕號天其平生省定孝養無  
不致其誠愉色婉容無不竭其誠頃歲母  
堂齡逼耄耄源君亦近古稀於是兩情彌  
切百事皆拋公務之外不離其傍余每觀

其行而感其志偶見哀詩飽察深衷因賡  
其韻弔慰服次

靈魂不返萬方求人去堂空事事幽身後記曾身後  
悔夢中通語夢中愁手持葑菜寸志亂口誦蓼我雙  
淚流鞠育恩深至今日長教餘慶一家留

與越智駿牧應平田黃軒招治具鄭重謝而  
有餘因賦一律而述卽事

問取儒流千載芳世間得失總相忘瑞雲分影芝山  
紫微雨含風梅子黃滿座兒孫家事足半床圖畫野  
情長靜觀新樹生生綠可樂亭中樂未央

送鶴見維敬 并引

鶴見維敬在寮十年常侍硯北且夕親炙  
一旦告別歸省故鄉臨期作一律以述遠  
別之情其志有所感故別賦川律而代禰

飲云

十年來學坐書棚判袂長辭同志朋歸日孤舟秋霧  
暗別時斜笠暑天蒸近陪雪月詠觴席挑盡江湖夜  
雨燈一寸丹心無隔遠風潮通信白雲層

顯妣貞良孺人忌辰追慕太切悲淚不乾賦  
仄律一章述衷情曼乙

秋初傷心遇諱辰三年已過三年暨香酒歡享室牖  
幽蘋蘩祐禩頃筐墜掩卷欲廢蓼莪詩忍渴豈知蒲  
萄味養堂唯酬水菽恩慙愧章綬拜猶未

九月十三夜書懷

晚秋爽氣轉淒涼夜色沈沈月滿堂閑坐不堪懷舊  
事新吟無意鼓枯腸霜來露往風雲影熱附寒離時  
世糴自笑身心日衰耗白頭高卧負清光

拾遺管爲範君拜詣先聖廟寄賜一絕拜謝

有餘言之不足演成原韻乃裁一律竭芹

誠伏希莞供

漢高牢祀祝昇平十月江東問舊名昔聞新詩勝白  
樣今看肅敬竭丹誠西曹策對孫謀大北野靈威神  
德明千里逢迎杏壇會潔染唯愧未豐盛

豫修 先大君大祥法會於東叡山有感而

作

大祥奈會喟然嘆抔土成封猶未乾勢入風雲天運  
變淚和霜露曉更寒正冠容色眼中見飛玉警咳耳  
底殘長使芳聲勵來學台轅屢問杏華壇

早梅 以蛇為韻永  
井伊豆守席

臘前春早奪韶華風送暗香村路斜水月是媒詩是

業冰霜為客雪為家細髭蒂固紅糝蠟踈影枝蟠綠  
骨蛇憐看孤山九臯鶴與花相約共生涯

除夜吟

仕隱頗知閑趣深青陽日逼隔分陰禦冬衣拜舊時  
賜守歲詩催老後吟作雨作雲翻覆手于今于昨是  
非心幽齋多夢前朝事睡覺不堪排枕衾

顯祖文敏先生忌辰有感而作

昔未成童今老翁忌辰五十五春風縹緲滿架生前  
樂宋墨留痕身後功園柳鳴禽新語澀村梅飛蝶舊  
綠空爐香無斷穗雲遠知有衷情地下通



謹祭天滿天神 并序

謹以粢盛菜肉茶菓清酒庶品致祭於天  
滿天神畫像有所期有所祈俯冀神威來  
格于茲因賦一律恭叙寸情

文章得業起貞觀槐府題名冠百官宰帥降遷天亦  
泣靈神崇祀廟長安英威照察大圓鏡明信煉修方  
寸丹千載餘情生氣在讒夫姦賊膽心寒

賀姬路城主中大夫榊原政邦承 台命赴

京師祝 新帝卽位而任拾遺補闕

門楣生彩報人知冠帶升階棣棣儀營柳陰深惠風

暖園花林遠淑光移玉觴分瀝瑤漿露金闕翻雲赤  
羽旗千里行程 君命重丹忱一寸繞丹墀

先考文穆先生忌辰追慕有餘感淚不乾謹

賦一律以述哀情

忌景偶當重五時香蒲角黍代明粢老來有病豈嫌  
病世事無知不欲知仕隱頻拋勲業鏡衰顏半亂髻  
毛絲湘江雲水與天遠招得靈魂讀楚辭

名和長年

皇駕蒙塵蓬底眠伯州韜跡水雲邊蒲帆風動家紋  
著松葉煙薰官旆鮮南木迎軍報攻戰北條殲族失

威權忠勤復祚祝千歲豈意身亡天運遷

顯妣七回忌辰 并序

母也天只生我劬勞山之高也惟其恩耳  
海之深也惟其慈耳追慕泣天進退惟谷  
輾轉伏枕寤寐無爲容貌在眼謦咳盈耳  
今茲辛卯七月朔且正當七回忌追遠之  
情太切如在之奠不措因賦一律以表寸  
忱

秋初爭禁炎暑溽永訣不返忌景促幼時慈愛猶有  
餘老去孝養更無足蓼莪濺淚廢雅章蘋蘩盈把亂

心曲夷險一節四十年焚香暗向影前告

中秋陰雨

佳期歲歲多遇雨隔簾驚看新月泣世事推移今亦  
然親朋離散在者歎鳳池感舊杜紫微瞻窟窟馳思許  
玄度老衰無意對清光不妨天路鎖雲霧

九月十三夜

重九節過五夜移何人更不起秋思浮雲除垢心中  
鏡清影添明鬢上絲羞以世間無限事却逢天象未  
盈時翰林身老我非我身負月空吟舊卷詩

弔錄司元云大和尚 并序

維正德元年歲在辛卯九月十一日僧錄  
司南禪元云大和尚卒于洛陽同月十七  
日訃達江府方外老友朝散大夫國子祭  
酒林驚具香酒茶菓揮淚作詩告其靈曰  
嗚呼和尚竟歿耶痛哉痛哉惟昔和尚齡  
逾弱冠我漸及壯歲初得託交把臂定盟  
遂成知己酬唱逝筒枕籍指異丁丑之春  
恭拜 鈞命得爲錄司指東班西班之轉  
位領掌五山十刹之出世我引其衣曰一  
時之名何如千秋之業勉旃莫懈和尚曰

固然勞心覃思夜分不寐自此而後兩情  
不隱交義倍常今夏西歸雲水遼遠須臾  
之間頓成千古悲哀斷腸知之乎不知之  
乎問之不聞呼之不應永訣之後不復得  
昔日之遊矣精神髣髴猶如未歿時也真  
歿耶未歿而夢耶不堪悼哭乃裁鄙律云  
別後銜悲感舊緣高秋爽氣轉凄然幽齋欹耳曼陀  
雨苦海脫身般若船日照鳳樓人已去風過鷺嶺道  
空傳靈魂入夢見顏色月在碧潭雲在天

亡嗣二十七回忌辰因賦一律以述感懷

淨辰追懷永訣日昔為強齡今白髮澗溪薄采蘋蘩  
 供風霜早凋蒲柳質世上榮悴逐時移人間苦樂向  
 誰述韓使來聘失舊規豈忘壬戌唱詩律自註曰壬戌之年與  
 汝逢韓客贈答數回今茲亦韓客來聘故云爾

除夜述懷

身體衰枯改舊容鶉居龜縮怕嚴冬  
 廬山投老艸堂靜韓客通交萍水逢  
 華髮懶梳星鬢亂暮齡餘筭夕陽春  
 有時不免人來往擁被清風欲聽松

鳳岡林先生全集卷之二十七

鳳岡林先生全集卷之二十八

男 朝散大夫國子祭酒林信充士僖父 輯

詩部

七言律詩

文敏先生五十六回忌追慕不歇悲哀有餘

謹賦一律以述餘情

昔抱 官恩興舊業今將衰老養閑情  
 于名于利世間友為子為孫門下生  
 禍福無端相倚伏行藏有道共論評  
 時糺變化百千萬五十六年方寸誠

賀男忞拜戴宅地 并序

去歲之夏次男恣字士彊辱拜 台命特  
賜宅地於城下參河町今歲之春土木功  
成門壁堂堂局合苟完卜定嘉辰擇集生  
員仲春六奠移居于茲恣也生于丁卯以  
來二十有六歲宵旰同舍不離我傍方今  
異居違我家塾不遠孔邇然存顧念乃知  
父子天性之恩無古今一也及出我門乃  
把其袂曰聞詩聞禮者聖門所以遠其子  
者也愿善憂惡者朱子所以訓其子者也  
好議人之長短妄論國之是非者馬援所

以制其子者也速成者廢晚成者善者王  
杲所以誨其子者也門之高可畏不可恃  
者柳玘所以誡其子者也一籠一猪者韓  
公所勸其子者也忠信立志清靜見操者  
胡氏勵其子者也我亦爲汝所諭告也我  
今身老氣羸唯所依賴者汝兄弟耳嗚呼  
兄弟者天倫也同氣同胎相親相睦一家  
之肥也一家之樂也汝以事我之孝而敬  
其兄以事我之勤而服其勞友愛和順永  
矢勿諉也若夫蘭蕙騰茂龍鸞並影稱一

雙之美得二難之名則為身為家為學為道珍重至祝所待無他因賦一律慶之賀之云爾

床有書囊壁有琴風斤收響忘機心黃鶯出谷遷喬木白鶴和音依庇陰世價唯求狀元策家教何換滿籛金桑樞雖窄小天下知覺工夫日日深

送下館侯承恩就國 并序

下館城主中大夫丹治直重君自冠歲且夕近侍先尊主累被登庸賜二萬石叙從四品為下館城主余與君日日遇於營中

二十五年議經論文交際殊睦今茲季春有命歸思賜利劔榮選可祝離情有餘因裁律詩一章以述鄙情曼乙

今唱陽關隔巷村昔陪台座奉晨昏征鞍春暖乘和氣雄劔霜寒耀武門水月風花思君切文談經義與誰論丹心豈忘忠勤志半感新恩半舊恩

顯考文穆先生三十三回忌辰追慕不已感情殊切因賦一律以抒餘哀

世粧翻覆作雲雨永訣三十三端午榮悴無常顧後前行藏有時感今古樛材留散半身存昌歎入喉寸

情苦地下精靈知不知雙男助祭奉顯祖

對五嶽 亾妣貞良孺人忌辰有感而作

歲月推移八歲過悲秋今日淚如何錦機曾爲慈教  
斷白髮更追衰貌多永訣無歸倍惆悵孝心不變屢  
吟哦舊恩難報又何恃家祭存誠廢蓼莪

送小堀克敬歸京師 并序

正德壬辰之秋京師郡司仁右衛門小堀  
克敬久在京師偶來江府拜謁未幾感勞  
太渥拔群出類辱列綠袍其祖先與余家  
有舊因然東西異居未能會面耐久惟肖歸

裝在近不堪相思因賦川律一章副以濃  
紙三束祝榮旋之舉而堅他後之交云

聞名雖慣相逢晚嵇阮神交千里通仙院棟材基址  
外皇畿治賦地圖中遠催歸計望辰北試酌離情量  
海東勿笑番番素箋薄寸丹絕勝五雲紅

和次男退省秋懷詩二首

喜汝晨昏惜寸陰郊居涼雨促清吟半窓綠竹含風  
動萬卷寶書連影森妙手高攀天上桂芳聲遠入我  
家林梧桐葉落漏新月安樂窩中秋已淡

新雁啼過溪北陰鏡湖夜半白雲深千林無葉秋聲

遠兩鬢有霜風色侵棣萼聯芳一家美蕙蘭同氣二  
人心韓懷杜興在何處叢菊開敷滿地金

謹以薄奠奉祀天滿大自在天神

天挺英豪集大成餘情及物死如生一株桂入慈堂  
夢千本松留靈廟名赫赫威風霜氣冷昭昭德化月  
光明瑤池秋色金波湧猶爲兒孫垂後榮

中秋雨

連霄未有不陰時殘暑收威十九推天意唯知約他  
日人間空復負佳期暮雲委地漆屏蔽細雨隨風絲  
緒垂南郡會遊應笑我已無絃管亦無詩

奉謝松平肥後守佳招謹表寸情

宗室雋望忠義全談經說理稱前賢青苔綠樹岩泉  
達紫電清霜劍戟鮮門表功勳現龍鳳家餘善慶珥  
貂蟬風雲長擁金天柱草木識名東奧邊

追悼潮信軒泰應公詩

并序

不觀彼雲與水乎哉逝者不留去者不歸  
聚而又散流而不息人間世亦然有生則  
死有始則終也故執政中大夫拾遺稻葉  
氏潮信軒泰應公者其先出自伊豫皇子  
歷數十世住美濃國武名累世勇威拔群



載在口碑今不贅焉公之祖曰佐渡守正  
成攻城野戰所向無敵改林姓而稱稻葉  
氏其子丹後守正勝幸遇 英主飽荷  
恩眷器量弘深姿度廣大興起家門預聞  
國政公祇服弘業克丕堂構砥節勵行貞  
固足以幹事隱括足以矯明浩浩焉汪汪  
焉與乎不可測也政權當任勲勞竭誠譽  
聲藉甚祿秩增加衆皆畏服民具爾瞻功  
名已遂身體亦老乞骸致仕閑居頤養賢  
嗣襲封長壽終身今茲九月六日正當十

七回忌辰靈魂不返無所欲尋雲水茫茫  
果夫何心乎余通家之交義等骨肉追慕  
不已感情太切因賦一律以叙舊懷

別來十有七星霜蓋世威權半熟梁一味葎昔元祐  
政午橋松竹晉公莊智謀流譽水江漢才器垂名國  
棟梁老圃菊存人已去西風吹淚近重陽

九月十三夜

欲雨秋空猶未雨倚欄醉賞菊花觴佳期難得卽天  
理人事易遷亦世粧飽覺明輝存本體生憎狂霧掩  
晴光老來任運頻拋鏡對影唯慚髻上霜

携雨息遊致仕拾遺越智君青山幽野散步

道遙漫賦一律奉謝佳招

衡門寂寂鎖松筠籬菊纔黃猶未勻  
岩徑寄身身告老流泉漱口口生津  
富山影遠含秋雪綠野堂深避世塵  
雲樹森然傳惠化園林雖舊德惟新

會津城主源正容別墅賦所見

遙看前嶺日西曛物外真遊思不群  
玄圃論文風入袂藍田種玉樹凌雲  
長松徑靜暮烟合細草岸曲池水分  
銅雀臺中秋色晚桂山蘭坂認餘薰

奉輓 文昭廟詩 并序

正德二年壬辰十月辛亥朔越十四日甲

子 贈相國正一位文昭公薨不俛貴賤

不論都鄙拊胸悲哀吞聲慟哭恭惟寶永

乙酉之夏 僕 辱獲徵書幸侍經筵其後每

月擇日進講弗輟屢賜時服或拜恩言二

男亦然眾皆為榮為國為道伏地泣血謹

賦一律以表寸忱

武威赫赫仰瞻俱豈意悲風滿八區  
冕服移床傳顧命畫棺執紼拂長途  
合并乾德遇龍悔說與徽音附鳳雛  
人本不歸天亦泣雲煙茫渺鎖蒼梧

故拾遺肥前侯藤伯固七回忌辰

富貧異等同情志一別幽明千里懸對月曾對穆生  
醴坐花屢拂謫仙筵數篇詩律非無感萬卷圖書失  
所傳老去唯支放翁枕七年夜雨思君眠

亾嗣惠忌辰有感而作

夙興采采蘋藻繫澗濱行潦薄言袷常嘆白壁黃壤  
埋愁看紺芽紅甲茁舊交無賴人間情精靈有知地  
下察別後自謂不長存空保殘生二十八

除夕書懷

書材託身駸駸老滿案筆硯懶洒掃 幼主獻壽祝

龜蓮兆民得所依魚藻富貧殊分本天生威權驚世  
亦物妖無毀無譽又無求家有雙男付吾道

奉拜 常憲廟追感舊時不堪永慕謹賦乙

律

五歲春回入廟門澗濱表信采蘋繫人間何事忽逢  
變地下如知合斷魂老淚濺花迷蝶夢悲風繞樹答  
禽言行藏稱意無求願亦是前時侍講恩

奉和致仕肥後羽林源公上元韻

綠野幽廬迎元夕粥膏甕麵味尤深坐傳鸚杓黃柑  
酒風奏鶯歌紅樹林萬朶燈花連市陌一輪月影隔

雲岑欲供太乙彩星現閑校家書催老吟

新居栽梅

退省  
席

茅舍栽梅幽徑長疎枝冷葉漏春光之其親愛友寒  
竹宴爾新昏妃海棠姑射神仙先引壽羅浮魂夢遠  
傳香向來若問和羹事與實真成上廟廊

顯祖文敏先生五十七回忌辰有感而作

昔嘗聞達辱徵書上下通情約水魚化教育才門業  
大時粧改觀世交踈老身任運未全棄庇廕應知猶  
有餘春夢驚回人不見松風梅月夜窓虛

顯祖忌辰家祭隨例門生預事此日大雪入

夜不歇懷舊之情欲罷不能因賦一律以

抒寸情

衣稜衾鐵恐寒威春雪休言勢轉微過客迷塗行不  
得親朋擁坐醉無歸悉知嘉兆賦天瑞自笑頽齡及  
古稀禁體昔遊誰共說十人唱和九人非

書懷

秦狼跋竟楚猴斃漢室興勳勳業全古往今來變陵  
谷世移時替異山川國無忠諫國非國天有明威天  
又天雛鶴和音歌白雪陽春一曲約千年

春酒介壽

并序

今茲孟春余齡及古稀一家墳麓開筵賀  
之親朋塾生會集報歡以春酒介壽爲題  
竊擬慶壽之飲因贅一律

老來對酌醉醺醺陶令謫仙吾亦云兒輩合歡長獻  
壽旅酬序齒細論文村村紅杏樽中熟處處玉梅盃  
底薰欲換金龜當酒債四明在客嘯風雲

我家二子一女賀余七十齡筭開宴招集親  
族門生塾徒家隸壽酒已巡賀詩早成因  
賦一律自警云

危齡任運古來稀半隱休官生業微貞白長於八洞

坐陶朱遠向五湖歸世情如水有難住天理似雲無  
所依老境終當全晚節豈忘君子見先機

喜下館城主丹治公枉高軒漫作一律以述

謝意

窄窄柴門幽徑通煙雲含暖氣融融喜君蚤擢鰲頭  
選愧我空爲鶴髮翁萬卷圖書西陽府半庭花卉午  
簾風清談多及昔時事恍在一場春夢中

遊細川君別莊 并引

暮春二十六日遊致仕羽林細川越中守  
別莊散步園中佳興有餘漫賦一律謝之

祝之

掛冠解綬卧幽莊歸去來今樂未央桃李春風今日  
約松篁門戶舊時粧苔溪侵履迢迢綠花靄穿衣點  
點香身老心閑無所預細推物理感行藏

送藝陽侯中大夫拾遺西歸

富貧異等志情同况又交盟世世通嗟我祖筵傷遠  
別喜君藝苑得新功貂蟬傳美七朝業龍驤馳才千  
里風先祝熊羆示佳兆西歸卜夢莫忘東

送熊谷直平

并序

熊谷氏之子直平長洛陽來學東武侍我

絳帷十有二年去歲祿仕肥後國主今夏  
從駕西歸嫡勇士僖作詩送之以添行色  
因同其韻祝之期之

東西各指一方天騎士同行前後連夜雨十年燈火  
淡滄溟千里布帆旋已知詩律江山助亦是翰林風  
月緣新進何心傷遠別丈夫志氣古來傳

偶應致仕保山嘉招散步園中奉謝厚意謾

賦一律

偶尋崔氏玉山莊似入裴公綠野堂佳境認名題石  
表長流分派出天潢晴湖雲遠六橋路烟樹陰濃數

鳳岡神虎門前掛冠後松風約老壽無疆

端午忌辰書懷

忌辰空遇三十四憂思如醉寤又寐手把昌陽昔年  
情眼看艾人今日淚白首無求天所知青箱有業世  
未棄禍福倚伏互相酬絲絲纏繫亦何意

後前押呈保山君 并序

日之昨偶訪致仕保山源君幽莊舊不遺  
鄭重之情謝而有餘感佩弗輟叨賦一律  
以供莞具乃賜瓊報吟讀自珍因儗前押  
表呈寸忱

祝君先人栗田莊尚齒唯期會一堂觀物要須羞白

髮乘流行欲問銀潢天衾地枕漱泉石朝杖暮鞋攀

壑岡前代餘恩談未了蒼蒼山水共無疆

本朝左府  
藤在衡公

栗田莊修尚  
齒會故用之

臯月望嫡男信充始產一女舉家欣歡以爲

嘉兆床掛褱衣座酌壽酒信充乃賦一律

賀之祝之因嗣其韻切期後榮

一家規祝酌壺觴震夙膺時樂未央曾卜歐陽雌鶴  
夢唯期蘓氏小龜祥閨中示瑞呱聲達膝上分恩喜  
色揚發秀好堅知有近天降嘉種正其疆

奉和豐州刺史丹治君在常州下館城被示

詩韻

別來隔地二三州知與雲山泉石儔雅會通情孤枕  
夢歸心有待太刀頭笙鸞聲遠將將響琴鶴堂深事  
事幽梅雨滿林新樹綠清陰不改舊時遊

賀桑名城主拾遺源君榮選 并序

孟夏 幼大君有將軍拜賀之儀桑名城  
主拾遺補闕源忠雅君豫蒙 官命遠赴  
京師五月某日拜趨 禁廷咫尺 天顏  
謹告敬謝殊降觴瀝且賜寶劍改拾遺補

闕而遷親衛郎將榮選超群令譽及遠雖  
進於祖先之爵級亦是祖先勲業之餘化  
也誰不頌祝之乎誰不慶賀之乎因賦一  
律以表寸忱云

神京千里路漫漫征旆風輕拂玉鞍長孺拾遺超爵  
位樊英有待設崇壇百夫繼美虎賁織兩影示威鵬  
尾冠使節義高歸太後武門長報一家歡

先妣九回忌辰有感而作

秋初苦熱不勝情又遇忌辰含宿醒孝養無全空自  
悔警咳在耳轉相驚老身難預他年會明祀唯存今



日誠靜見梧桐飄一葉人間變態細論評

七夕

河漢渺漫秋色奇金風玉露轉淒其樓頭乞巧雖非  
願杙上繙書有所思未遇君平卜機石詎知玉母降  
瑤池爲雲爲雨人間事千古星盟無絕期

奉悼尾張中納言詩 并序

銀青光祿大夫龍作源公者當世懿親武  
家俊傑尾陽侯源敬公曾孫也幼繼封籍  
身居顯官守世及之訓著似續之譽爲善  
最樂恭謙和順金璧其操鸞鳳其次德音

如斯名位如斯雖得人爵未得天爵今茲  
七月二十六日薨于正寢年二十五嗚呼  
悲哉惜哉若保天年則其遠大不可測知  
焉僕祖林忠出入敬公之門眷遇最渥創  
建聖堂于林忠別莊棟梁高聳禮器悉備  
春秋二仲祭祀無闕顧夫非敬公之盛舉  
乎龍作公修其舊因黃堂下榻厚意丁寧  
飽荷盛眷屢携二子近坐講席或陪杖屨  
散步園中或觀劍馬逍遙塲中雲龍逐影  
水魚通情於是不堪慟哭謹賦一律以表

微衷

藩屏盤石事皆非  
武藝英姿剩德威  
漢殿論經搜舊籍  
梁園珥冊忘心機  
麟眸失影知何處  
龍種乘雲長不歸  
金璽空存龜紐絕  
西風吹淚濕人衣

遊村喬舍詠菊花

風露淒其歇衆芳  
東籬佳色傲嚴霜  
細評名譜百十種  
偏愛坤爻六五裳  
老圃秋容持晚節  
仙家壽客臥幽莊  
主人和樂天倫樂  
花有鴛鴦與棣棠

老書生菊池武雅示新作一律有感有情句

意優長叨同其韻以賦自述

先主恩深絕等倫  
許身竊比世忠臣  
雄飛曾逐鳳籠志  
蛸縮今頤虵鬼神  
金燭送迎惟有夢  
翰林酬唱更無人  
青氈舊業傳清白  
虛飾豈論楨上麟

菅神肖像

夙出西曹侍太皇  
恩榮擢選萬夫望  
上天桂送一枝影  
北野梅飛千里香  
乾象虧盈遇亢悔  
神威示德現璽光  
凜然生氣本朝鎮  
豈脫衣冠入大唐

八月十五夜

昔侍父兄良夜醉  
佳期有約卜晴陰  
金城賜宴舞衣動  
白髮添明恩佩深  
英主乘龍雲際去  
親朋化鬼

夢中尋翰林宋宗舊情改勿笑老夫在夏吟

奉賀館林城主從四位下侍從兼兵部大輔

越智公母堂八十壽筭賦慶壽行禮詩而

寓規祝之意

記得紹興慶事全福榮傳美一堂前官班祿秩家門

大子葉孫枝木葦堅靈藥還丹描洞術淡眉點字鵲

橋仙春遊猶待長生約鶴在松陰龜在蓮宋高祖紹興二十九年

正且太后年八十行慶壽禮紹興二年皇太后聖壽八十楊廷秀作福榮堂記天壇山王母洞中有仙

藥中巖有仙描洞煉丹辛幼安慶岳岳母八十作鵲橋仙詩有烟脂小字點眉間之句

肥前長崎監護官備州刺史大岡氏浩然齋

主今秋歸休江府一日鼎來盍簪修交支

頤促膝談及清國風化之事聊以足娛心

新耳也因賦一律以謝惠來

君居西港我東都兩地風光形狀殊鄉國萬重層靄

遠滄溟千里片帆孤始知夷狄有明主休道中原無

義夫晁監太歸消息絕飄然亦是欲乘桴

仲冬小晝大雪

臘前乾燥厭風塵此日何愁寒荐臻心似歸禽無所

止身加屈躄不求伸菜羹聊換三盃酒柴火屢添一

束薪侵雪鬢毛難辨影白堆堆裡白頭人

亡子忌日有感作

積鬱有餘多少思偏驚二十九年移送迎筭歲纔三日禍福異門惟一時屈雙求伸伸又屈羸驂扶老老彌羸殘生兀兀已無幾手采澗毛歸太遲

除日書懷

貧富惟天總勿論試將午字欲書門人中還有鼠爲虎世上豈無鵬與鯤架栢縹緗祖先業家傳簪笏舊時恩不知身老暮齡迫愛惜斜陽戲女孫

恭拜 常憲尊廟見庭梅有感而作

番信報春和氣雍疎枝開示雪霜封金髭撚斷今朝

淚玉色昭四舊日容御愛認名真廟檜貞標與潔茂陵松年年空返冰魂去恨入香風花影重

常憲尊廟正忌景謹賦一律以代澗毛

恩惠山高水又長每逢諱景淚沾裳黃梁半熟夢中夢白髮加多霜後霜俗態須叟致雲雨德容彷彿覩羹牆唯餘治化至今日海內威風我武張

諸葛武侯

南陽耕隱草廬幽豈意存亾爲國謀三顧恩榮終不報一生忠憤死無休志如尚父把旄誓智似留侯借箸籌義氣唯餘出師表英雄千古恨難收

顯祖五十八回忌辰有感作

憶昔幼齡陪膝下句讀口授日又夜胡蝶幽夢知有  
情天驥良才論無價清白遺教揚震家縹緇傳業玄  
晏架永訣五十八年過省身唯愧伯玉化

姑洗十九日再遊致仕甲斐國主保山源悉

別莊叨賦一律

松柏交陰樹色齊滿林紅紫影昂低鑿開南紀和歌  
浦圍繞西湖蕪氏堤舉世悉迷城市路脫身長託水  
雲棲鳴禽似惜韶光老昨日春風桃李蹊  
鳳岡林先生全集卷之二十八

